

Kalaallit Nunaanni aqqusinertigut angallannermut inatsit

Matumuuna Kalaallit Nunaanni aqqusinertigut angallanneq pillugu inatsit nalunaarutigineqarpoq, tak. inatsit nr. 832, 18. december 1991-imeersoq inatsisip nr. 497, 17. juni 2008-meersup kingunerisaanik allannguutitalik.

Kalaallit Nunaanni aqqunertigut angallanneq pillugu inatsimmi nr. 497, 17. juni 2008-meersumi (Imagassartorsimatilluni biilerneq, snescooterinik ingerlatsisinnaanermut ukiut piumasaaqatit, ujatsiutaasaqartussaataaneq il.il.) § 1-ip kingunerisaanik allannguut inatsimmik nalunaarummut matumunnga ilanngullugu suliarineqanngilaq, allannguutip atuutilerfissaa ulloq justitsministerimit aalajangernertussaammat, tak. inatsimmi nr. 497, 17. juni 2008-meersumi § 2, imm. 2.

Kapitali 1

Inatsisip atuuffia il.il.

§ 1. Inatsit manna allatut aalajangiisoqanngippat atuuppoq aqqusinerni, illoqannginnersani allanilu nalinginnaasumik imaluunniit angallatit assigiinngitsut arlallit angallatigalugit angallannernut. Qimussilli aqquataanni qimussernermut atuutinngilaq.

§ 2. Inatsisip atorneqarnerani nassuiaatit makkua tunngavigineqassapput:

- 1) *Qamutit*: Aaqqissuussaq sunaluunniit aqqusinikkut illineqanngitsukkut ingerlasinnaasoq assakaasoqaralaruni, qiterutaasaqaralaruni, valseqaralaruni, perlaaqaralaruni allanilluunnit pilersugaagaluaruni.
- 2) *Qamutit motorillit*: Qamutit motorimik ingerlateqartut. Qamutit taama ittut immikkoortiterlugit makkuupput: Qamutit motorimik ingerlatillit, traktorit, sakkutut atortut motorillit, knallertit snescooterillu.
- 3) *Qamutit motorimik ingerlatillit*: Qamutit motorillit annerusumik immikkut inunnik angallassissutitut usisaatitulluunniit aaqqissuussat, imaluunniit sananeqarnermikkut annertunerusumik allannguuteqartitaanatik allanngortinneqarsinnaasut nal.akunneranut 30 km sinnerlugit sukkassusilimmik ingerlanissamut. Qamutit taama ittut immikkoortillugit tassaapput biilit motoreykelillu.

Imm. 2. Nalornisoortoqartillugu transportministerip aalajangiivigissavaa qamut pineqartoq imm. 1-mi nassuiaatinut ilaatinneqarsinnaanersoq.

Kapitali 2

Qamutit pillugit aalajangersakkat

Qamutit aaqqissuussimaneri atortuulu

§ 3. Qamut sunaluunniit imatut aqqissorneqarsimallunilu imatut aserfallattaaliugaasimassaaq allanut navianartorsiutaanani ajoqutaananilu aammalu aqqusinernut innarliissutaanani atorneqarsinnaassalluni.

Imm. 2. Piginnittoq imaluunniit inuk (atuisoq) sivisuumik atuisussaasoq qamutip inatsisinut naapertuuttumik pissuseqarnissaanut akisussaassuseqarpoq.

Imm. 3. Qamummik ingerlatsisup qanoq ilisukkulluunniit qamutip kalusiuttagaqarpallu taassuma isumannaatsuunissaat sianigisassaraa pingaartumik sianigissallugu aquutit, kigaallasaatit, kalerrisaarutit nalunaaqutsersuutillu kiisalu qulliit peqqussutigineqartutut ittuunissaat isumannaatsuunissaallu, aammalu qamummut kalusiuttagaajunnartup atassusernerata aarlerinaatsuunissaa.

§ 4. Transportministeri aalajangersagaliorsinnaavoq qamutit aqqissuunneqarnerat, atortui pisataallu aammalu ingerlatitsisut ilaasullu imminnut navialitsaaliuuteqarnissaat pillugit, kiisalu aalajangersinnaallugu nakkutigineqarsinnaaneri pissutigalugit sunik allagartaqarlutillu nalunaaqutaqartinneqassasut.

Imm. 2. Transportministeri aalajangersagaliorsinnaavoq qamutit pisataasa atortuisalu aammalu ingerlatitsisut ilaasalu navialitsaaliuutaasa nioqputaajunnaarnissaannik, taaneqartut tamakku imm. 1-imi aalajangersakkat eqquutitinnigipatigit, imaluunniit tamakkua atorneqarnerisigut ingerlatitsisoq angallattulluunniit allat navianartorsiortitaasinnaappata imaluunniit annikitsuunngitsumik ajoquserneqaratarsinnaappata.

Imm. 3. Angallannerup isumannaatsuunissaa isumagalugu pisariaqartinneqarpat qamutip imm. 1-mi aalajangersakkat eqquutitikkaluaraluunniit atorneqarnissaa transportministerip inerteqqutigisinnaavaa.

Qamutit nalunaarsorneqarnerat

§ 5. Qamut motorilik sunaluunniit atorneqalersinnani, taamaattorli tak. imm. 2 aamma 6, qamutitut nalunaarsuiffimmut allanneqarsimassaaq normulerfilerneqarsimasallunilu.

Imm. 2. Skatteministeri ilaatigut pisariaqartillugu aalajangersakkamik tamatuminnga atuisitsinngitsoorsinnaavoq.

Imm. 3. Qamutit allat motorimik ingerlateqartut atorneqalinnginnerminni nalunaarsorneqarnissaat normulerfilerneqarsimanissaallu pillugit skatteministeri aalajangersagaliorsinnaavoq, taamaattorli takuuk imm. 6. Taamatullu pineqassapput qamutit qamutinit motorilinnit kalinneartussat naatsorsuussat.

Imm. 4. Skatteministerip aalajangersinnaavaa qamutit motorimik ingerlateqartut aqqusernit illoqannginersallu imm. 1-imi taaneqartut avataani atorneqartut atorneqalinnginnerminni

nalunaarsorneqassasut, normulerfilerneqassasut imaluunniit nalunaarsuinerimi ilisarnaaserneqassasut, taamaattorli takuuk imm. 6.

Imm. 5. Taamaattorli takuuk imm. 6, makku pillugit skatteministeri malittarisassiorsinnaavoq

- 1) nalunaarsuineq,
- 2) nomulerfilersuineq aamma
- 3) nalunaarsuinerimi ilisarnaasersuineq

Imm. 6. Sakkutuut qamutaat nalunaarsorneqartassapput maleruagassat forsvarsministerip aalajangersagai malillugit.

Qamutit nakkutigineqarneri

§ 6. Politiit qamut unitsissinnaavaat misissortillugu ajoquteqarnerisooq amigaateqarnerisoolu, aammalu paasiniarsinnaallugu ingerlatitsisooq unioqputitsinani qamummik ingerlatitsinissamut piumasarineqartunik naammassinnissimanersooq.

Imm. 2. Politiit sukkulluunniit pisinnaatitaapput qamut motorimik ingerlateqartoq qamulluunniit qamummit motorimik ingerlatilimmit kalitassatut naatsorsuunneqartoq aggiuteqqusinnaallugu inatsit manna imaluunniit inatsit manna malillugu aalajangersakkanik naammassinnissimanersooq paasiniarlugu misissugassatut. Qamutit taamaattut piffissanngoraangat misissorneqartarnissaat pillugu transportministeri aalajangersagaliorsinnaavoq.

Imm. 3. Qamut imm. 1 aamma imm. 2 malilugit misissorneqarnermini piumasarineqartunik naammassinnissimangippat atorneqarnissaa politiit inerteqqutigisinnaavaat normulerfialu peersinnaallugu. Aamma taama iliortoqassaaq imm. 2 malillugu aggiuteqquneqaraluarluni aggiunneqanngitsoorpat.

§ 7. Nalunaarsorneqarnermut, normulerfinnut nalunaarsuinerimi ilisarnaatinut akiliutissat skattemisterimit aalajangerneqarsinnaapput.

Imm. 2. Qamutit misissornerannut akiliutissat transportministerip malittarisassiuussinnaavai.

Qamutit Kalaallit Nunaanni pigineqartuunngitsut

§ 8. Qamutit Kalaallit Nunaanni pigineqartuunngitsut Kalaallit Nunanni atorneqarnissaat pillugu skatteministeri aalajangersagaliorsinnaavoq, tamatumunnga ilanngullu qamutit taama ittut qaqugu Kalaallit Nunaanni nalunaarsugaasussaalernissaat.

Kapitali 3

Qamutit il.il. ingerlatitsisui pillugit aalajangersakkat

Imigassartorsimalluni aammalu promillip killissaa sinnerlugu imersimalluni ingerlatitsineq il.il.

§ 9. Imigassartorsimalluni ingerlatitsisutut eqqartuuneqassaaq qamummik motorimik ingerlatilimmik ingerlatitsisoq imaluunnit ingerlatitsiniaraluartoq ima atsigisumik imigassartorsimareerluni ingerlatitsisilluni ingerlatitsinermiluunniit kingorna, 0,50 promille sinnerlugu aava imigassamik akoqalersimasoq.

Imm. 2. Aammattaaq imigassartorsimalluni ingerlatitsisutut eqqartuuneqassaaq qamummik motorimik ingerlatilimmik ingerlatitsisoq imaluunniit ingerlatitsiniaraluartoq ima atsigisumik imigassartorsimasoq aarlerinaatsumik ingerlatitsisinnaajunnaarluni.

§ 10. Qamutip motorimik ingerlatillip ingerlatinneqarnissaa ingerlatinniarneqarnissaaluunniit inerteqqutaavoq taamaasiortoq tassaappat nappaamik, nukillaarsimanermik, qasupiloorsimanermik, sineqqalaarpallaarsimanermik, nakorsaatinik qiimmatsitsisartunik uerngalersitsisartunilluunniit sunnerneqarnermik assigisaannilluunnit peqquteqartumik qamummik taama ittumik isumannaalluartumik ingerlatitsisinnaanngitsaq.

Imm. 2. Aammattaaq qamut ingerlatinneqarnanilu ingerlatinniarneqassanngilaq kimilluunnit siuliini taaneqartut peqqutigalugit imaluunniit imigassamit ima sunnerneqarsimatigisumit qamummik isumannaatsumik ingerlatitsisinnaanngitsumit.

§ 11. Inerteqqutaavoq qamummik ingerlatitsisunngortitsinissaaq inummut § 10, imm. 1-imi taaneqartut peqqutigalugit imaluunniit imigassamik sunnerneqarsimanini peqqutigalugu qamummik isumannaatsumik ingerlatitsisinnaanngitsumut.

Imm. 2. Inuk neriniartarfinni sutorniartarfimmiluunniit allami tamanut ammasumi imigassartorsimappat, sutorniartarfiutillillu imaluunniit taassuma ikiortaasa nalunngippassuk pissutissaqarlutilluunniit isumaqarpata inuk pineqartoq qamummik ingerlatitsisuusoq imigassartorsimaninilu peqqutigalugu isumannaatsumik qamummik ingerlatitsisinnaanngitsaq, taava sutorniartarfiutillip imaluunniit ikiortaasa soorlu politiinik aggeqqusinikkut qamummik ingerlatsitsaaliussavaat.

§ 12. Politiit qanoq ilisukkulluunniit piumasarisinaavaat qamummik ingerlatitsisup silammut anersaartillugu imigassartorsimaneranik paasiniaaffigineqarnissaa.

Imm. 2. Politiit inuk misissugassanngortissinaavaat aassiortillugulu qoorsiugassatut, pissutissaqartumik isumaqarunik § 9-mik imaluunniit § 10-mik unioqqutitsisimasoq, imaluunnit silammut anersaarnikkut paasiniaaffigineqarnissaminut naaggaarsimappat taamaalorsinnaasimanngippalluunniit. Aammattaaq imigassartorsimanermik pasitsaassineq allanik pissuteqarsorinarpat nakorsamut misissugassanngortissinnaavaat. Aamma taamaalorsinnaapput immikkut ittunik patsiseqarlutik imigassartorsimasutut pasigunikku.

Imm. 3. Paasiniaanerit misissuinerillu imm. 1- imi 2- milu taaneqartut pillugit justitsministeri aalajangersagaliorsinnaavoq.

Ingerlatitsisinaanermut allagartaq uppersarsaat

§ 13. Qamutit motorimik ingerlatillit, traktorit sakkutullu atortut motorillit, kisianni gaffeltruckit ilanngunagit, taamaallaat ingerlatinneqartussaapput inummit ingerlatitsisinaanermut uppersarsaatilimmit. Ingerlatitsisup ingerlatitsisilluni uppersarsaatini immiitissavaa piumasarineqarpallu politiinut takutittussaallugu.

Imm. 2. Imm. 1 atuutinngilaq traktorimik sakkutullu atortumik motorilimmik ingerlatsinerni ingerlasarfinni assiaqutinik nalunaaqqutsersuutinilluunniit isumannaatsumik killilersukkani. Aammattaaq atuutinngilaq sakkumut atortumut motorilimmut pisuinnartumit ingerlanneqartussiamut. Qamutinik taamaattunik ingerlatitsisusinnaapput inuit 16-inik ukioqalereersimasut.

Imm. 3. Ingerlatitsisinaanermut allagartaq uppersarsaat tunniunneqarsinnaavoq inummut.

- 1) 18-inik ukioqalereersimasumut, taamaattoq tak. § 14, imm. 1,
- 2) Naammattumik tappissuseqarlunilu tutsarissusilimmut aammalu tarnikkut timikkullu ajoquteqanngitsumut, aamma
- 3) Misilitsinnermigut takutitsisimasumut ingerlatitsinissamut naammattumik pikkorissuseqarnerminik aammalu qamummut passunnissaanullu taamatullu angallanneq pillugu maleruagassanik naammattunik ilisimasaqarnerminik.

Imm. 4. Ingerlatitsisinaanermut allagartamik uppersarsaammik tunineqarsinnaassanngilaq kinaluunniit ikiaroorartunik silassorissutsimulluunniit sunniisinnaasunik allanik atuivallalersimasoq imaluunniit imerajuttunngorsimasoq. Tamakkununga tunngasutigut apeqquiti eqqartuussisunut suliaassanngortitaanissaat piumasarineqarsinnaavoq.

Imm. 5. Ingerlatitsisinaanermut allagartartaarniarluni qinnuteqartoq qamummut ingerlatitsisuuffissaminut allagartamik uppersarsaammik pigisaqareersimanngitsaq ingerlatitsisinaanermik ilinniartinneqarsimasussaavoq inummit politiinit taamaasiornissamut akuerisamit.

Imm. 6. Inuit imm. 5-imi taaneqartutut ingerlatitsisinaanermut ilinniartitsisussat akuersissutigineqartarnissaat pillugu justitsministeri maleruagassaliorsinnaavoq.

§ 14. Justitsministerip akuersissutigisinnaavaa inuit arlaatigut ajoquteqannginnissamut aalajangersakkanik nalinginnaasunik naammassinissimanngitsut ingerlatitsisinaanermut uppersarsaatinik immikkut ittunik tunineqarnissaat, aammalu timimikkut innarluutillit qamutaannik arriitsumik ingerlasinnaasunik ingerlatitsisinaanermut allagartat uppersarsaatit inunnut 15-inik ukioqalereersimasunut tunniunneqartarnissaat.

Imm. 2. Qamutit motorillit inuutissarsiutit inunnik angallassinermut atorneqartut ingerlatitsisuuffiginisaannut allagartamik uppersarsaammik tunniussinissamut patsisissaatitaasunik allanik justitsministeri aalajangersaasinnaavoq. Ingerlatitsisinaanermut allagartap uppersarsaatip taama ittuq tunniunneqarnissaa itigartitsissutigineqarsinnaavoq pinerluttulerineq pillugu Kalaallit Nunaannut inatsimmi § 114, imm. 2-mi taaneqartutut patsisissaatitaq tunngavigalugu.

§ 15. Ingerlatitsisinnaanermut allagartat uppersaait, ilanngullugit ingerlatitsisinaanermut misilitsinnerit aammalu allagartat uppersaait qanoq sivisutigisumik atuutinnissaat nutarterneqartarnissaallu, pillugit maleruagassanik erseqqinnerusunik justitsministeri aalajangersagaliussaaq. Ingerlatitsisinnaanermut misilitsinnernut allagartanillu uppersaaitaarnernut akiliutissat pillugit ministeri aalajangersagaliorsinnaavoq.

Ingerlatitsisusinnaanermik arsaarinnikkallarnek piginnaatitaaqqilernerlu

§ 16. Ingerlatitsisusinnaanermik politiit arsaarinnikkallarsinnaapput pineqartup ingerlatitsisinnaanermut uppersaaitaarnissamik patsisissaatit naammassisinnaajunnaarsimappagit. Tamatuma aalajangiiffiginiarneranut pisariaqartitatut misissuinissanut imaluunniit misilitsinnissanut inuk pineqartoq suleqataajumangippat ingerlatitsisinnaanermut piginnaatitaaffianik politiit ingerlaannaq arsaarallarsinnaavaat. Pineqartup ikiaroomartunik imaluunniit silassorissutsimut sunniisinnaasunik allanik pinngitsuisinnaaneranik imerajuttuuneranilluunniit apeqqutit eqqartuussivinnut suliaassangortitaanissaat piumasarineqarsinnaavoq.

Imm. 2. Ingerlatitsisusinnaanermik piginnaatitsissut piffissami aalajangersimasumi atugassaajunnaarlugu arsaarinnissutaasimappat, aatsaat pissarsiareqqinneqalersinnaavoq piffissap atuiiffissaatitaangitsup naaneratigut, piginnittuusimasup ooqattaarummik misilitsinnini angusiffigisimappagu.

Imm. 3. Ingerlatitsisusinnaanermik piginnaatitsissut misiligummik arsaarinnissutaangikkallarpat piffisap politiit aalajangigaata qaangiutinnginnerani ingerlatitsisusoq ooqattaarummik misilitsissaaq. Ingerlatitsisusinnaanermik piginnaatitsissut arsaarinnissutigineqarallassaaq misilitsittoq angusinnigippat imaluunniit misilitsittussaagaluq misilitsikkumannigippat. Aammattaaq ooqattaarummik misilitsinnissaaq pissanngilaq eqqartuussaaq pissutsit arsaarinninnermut pissutaasut qaangiunnerisigut ingerlatitsisinnaanermut misilitsinnermini angusippat.

Imm. 4. Ingerlatitsisinaanermut ooqattaarutaasumik misilitsinneq tamatumunngalu ilagitillugu imm. 3 malillugu ingerlatitsisusinnaanermik arsaarinnikkallarnek pillugit justitsministeri aalajangersagaliorsinnaavoq.

Imm. 5. Ingerlatitsisusinnaanermut piginnaatitaassumminik arsaarneqarallartup arsaagaavissulluunniit ingerlatitsisinnanermut allagartaaq uppersaataatini politiinut tunniutissavaa.

Knallertit

§ 17. Knallertit inunnit 16-inik ukioqalereersimasuinnarnit angallatigineqassapput.

Imm. 2. Knallertimik angallatillip angalaarnermini nassatassaraa akisussaassuseqarnermut sillimmasiisimanerminut tamatumunngalu akilersuiuarsimanerminut uppersaait, tak. § 49, piumasarineqarpallu politiinut takutissallugu.

Snescooterit

§ 18. Snescooterit illoqarfiit eqqaani tamaallaat angallatigineqarsinnaapput 18-inik ukioqalereersimasunit. Taamaattotli naasorissaasoqarfimmi suliaqarnermi imaluunniit inuussutissarsiuutigalugu piniarnermi 16-inik ukioqalereersimasut snescooterinik ingerlatsinissaat politiit akuersaarsinnaavaat.

Imm. 2. ²⁾ Snescooterimik ingerlatitsisuusup angalinermini nassatassara akisussaassuseqarnermut sillimmasiisimanerminut tamatumunngalu akilersuiuarsimanerminut uppernarsaat, tak. § 49, piumasarineqarpallu politiinut takutissallugu.

Ingerlatitsisuunissamut sungiusarneq

§ 19. Inuit biilimik ingerlatitsisuunissamut sungiusartut biilernerat taamaallaat pisinnaavoq sungiusartuq sanileqarpat politiit akuerineqarsimasumik. Sungiusarluni biilerneq aatsaat pisinnaavoq sungiusartup ukiuni malillugit ingerlatitsisinaanermut allagartamik uppernarsaatitaarsinnaanera siusinnerpaamik qaammatinik 3-nik sioqqullugu aammalu inunnt ingerlatitsisuusinaanerminnik arsaagaasimasunut tunngatillugu siusinnerpaamik piffissap arsaarinniffiusup qaangiunnissaa minnerpaamik qaamatinik 3-nik sioqqullugu. Biilernermit sungiusarneq, ilaatillugit biilimi sungiusaammi kiap ingerlatitsisussaataanera, justitsministerimit erseqqinnerusumik maleruagassiuunneqarsinnaapput.

Nalunaarutiginnittussaaneq il.il.

§ 20. Qamummik piginnittoq (atuisoq) politiit qinnuteqarneratigut nalunaarutiginnittussaavoq inuit kikkut ingerlatitsisutut qamummik atuisimanerat pillugu.

Imm. 2. Piginnittup (atuisup), ingerlatitsisup allatullu qamummik motorilimmik atuisup inuk qamummik ingerlatitsisussatut akuerineqarsimanngitsoq ingerlatitsisussanngortissanngilaa.

Qamummik ingerlatitsisut Kalaallit Nunaamiuunngitsut

§ 21. Justitsministeri aalajangersagaliorsinnaavoq inuit Kalaallit Nunaanni najugaqavinningsut Kalaallit Nunaanni najugaqarallarnerminni qamutininik motorilinnik ingerlatitsisuusinaanerat kiisalu inuit Kalaallit Nunaata avataani qamutininik motorilinnik ingerlatitsisinnaatitaasut allagartanik uppernaarsaasiuuttarnisaat pillugu.

Kapitali 4

Aqqusinertigut angallannernik tamanik aalajangersakkat

T

unngaviusumik maleruagassat

§ 22. Angallattut qajassuussisumik pissuseqarlutillu mianersortussaapput tamatumuuna allat ulorianartorsiortinneqaleqqunagit imaluunniit ajoquserneqaqqunagit imaluunniit akornusersorneqaqqunagit aammalu taamaasilluni angallanneq pisariaqanngitsumik akornuserneqaraniluunniit akornusersorneqaqqunagu. Aammattaaq kikkulluunniit aqqusernup killingani najugaqartut uninngaartulluunniit mianersorfigineqassapput.

Imm. 2. Pingaartumik mianersorfigineqartussaapput meeqqat, atuartut ingerlavissaanik nakkutiginnittuutit, utoqqaat inuillu pingaartumik justitsministerimit aalajangerneqartut malillugit ilisarnaateqartut imaluunniit aamma pissutsit takussaasut naapertorlugit isigiarsuttut tutsarluttulluunniit allatulluunniit timikkut amigatillit napparsimasulluunniit, angalaniarnerminnut ajornartorsiortitsisumik.

Imm. 3. Qamutininut qimminik qimuttulinnut aammalu uumasuutininut ingerlanneqartunut qamutininik motorilinnik ingerlatillit immikkut mianersortussaapput pisariaqarpallu unittussaallutik.

§ 23. Angallattut peqqussutinik politiiniit usserarnikkut, allattarfiusatigut napasutigut, nalunaaqutsersuutitigut kalerrisaarutitigulluunniit unnersuussutigineqartunik malinnissapput. Angallattut unittussaapput politiit uneqqusillutik ussersorpata.

Imm. 2. Politiit pisariaqarsorigunikku ingerlaarfinni ingerlaarnernik aqqissuussisinnaapput aqqusernillu ataasiakkaat angallaviunissaat pillugu aalajangersaasinnaallutik.

Imm. 3. Allattarfiusanik napasunik nalunaaqutsiinerit, nalunaaqutsersuinerit kalerrisaarinerilluunniit aammalu aqqusernit ataasiakkaat imm. 2 naapertorlugu angallaviunissaat pillugit politiit aalajangiineri sapinngisamik pissapput kommunalbestyrelsimut susassaartumut isumaqatigiinniareernikkut.

Imm. 4. Justitsministeri aalajangersagaliorsinnaavoq allattarfiusat napasut, qaammartartumik nipilimmilluunniit kalerrisaarutit nalunaaqutsiussallu allat ilusilersornissaat, qanoq-isumaqartitaanissaat inissinnissaallu pillugit imaluunniit aqqusinertigut angallannermut aqqissuussinertut imaluunniit mianersoqqussutitut ilitsersuutitulluunniit aqqusinermi aqqusinertulluunniit killingani aqqissuussassat pillugit.

Aqqusinertigut angallannikkut ajutoortoqartillugu pisussaaffiit

§ 24. Angalaartoq nammineq pisuulluni pisuunaniluunniit angallannermi ajutoortoqarneranut akuliuttoq erninnaq unissaaq sapinngisanili tamaat ajoqusertoq ikiorniartussaallugu. Aammattaaq pineqartoq angallannermik isumannaallisaanisaq eqqarsaatigalu ajutoortoqarnera pissutigalugu iliutsini peqataassaaq. Ajutoornermi akuliuttup allap qinnuigippani atini najukkanilu pineqartup nalunaarutigissavai. Illu pigisarluunniit ajoquserneqarsimappat piginnittuusup qinnuteqarneratigut aamma taamatulli paasissutissiisoqassaaq.

Imm. 2. Inuk alla ajoquserneqarpat ajoqusernerlu annikitsuunngippat ajoqusiisoq sapinngisamik piaarnerpaamik politiinut kalerriissaaq. Illu pigisarluunnit ajoquserneqarpat aammalu imm. 1-imi taaneqartunik nalunaarfigineqarsinnaasunik najuuttoqanngippat ajoqusiinermut pisuusup ajoqusikkanik piginnittut politiilluunniit piaarnerpaamik kallerrissavai.

Imm. 3. Angallannermi ajutoornikkut toqutaasoqarpat imaluunniit ajoquserujussuortoqarpat ajutoorfiusumi sunilluunniit allannqortitsisoqassanngilaq imaluunniit malunnaatit ajutoornerup

qanoq pinerata paasineqarnissaanut pingaaruteqarsinnaasut peerneqassanatik. Qamulli ajutoornermi akuliussimasoq illuartinneqassaaq inissisimanagera angallannermut ulorianartorsiortitsippat.

Imm. 4. Kinaluunniit nammineq pisuussutigisaminik pisuussutiginnigisaminilluunniit allattarfiusanik napasunik, qamutit ingerlaarfiannut nalunaaqutsersuutunik kalerrisaarinnermut atortulersuutunik allanilluunniit angallannermut iluarsaasissaaq. Iluarsaasiniarneq ajornassappat pineqartup piaarnerpaamik politiit kalerrissavai aammalu saniatigut angallattut allat mianersoqqunissaannut pisariaqarneratut iliuuseqassalluni.

Piumasaarsornerit il.il.

§ 25. Qamutitut ingerlasunut ikeriarneq imaluunniit najummatserfeqaannarluni ataniarneq imaluunniit qamummik, qamutitik uniartakkanik, qamutitik pinnguaatinik assigisaannilluunniit qamutit motorillit kingornannut nivinngaanissaq inerteqqutaavoq.

Aqqusinernik il.il. minngersaaneq

§ 26. Sunilluunniit angallannermut ulorinatorsiortitsisinnaasunik navialissutaasinnaasunilluunniit aqqusernermut igitsisoqaranilluunniit qimaannaasoqassanngilaq.

Imm. 2. Qamummiit aqqusernermut katatsisoqarpat imaluunniit userartuisoqarpat angallannermut ulorianartorsiortitsisinnaasunik imaluunniit akornusersuutaasinnaasunik taamaattut piaarnerpaamik peerneqassappat. Tamanna pisinnaanngippat angallattut allat nalunaaqquniarneqassappat ulorianartorsiortitsisusup akornusersuutaasulluunniit peerneqarnissaat tikillugu.

Imm. 3. Suulluunniit angallannermut aamma akornusersuutaasinnaasut aqqusernermut ilineqaratilluunniit tamaani uninngatiinnarneqassanngillat politiinit, naleqquttumik nalunaaqutsiisoqarnissaata akuerineqaaqqarnissaanik piumasaqaateqarsinnaasunit, akuerineqaaqqaartinnani.

Imm. 4. Quit (illuaqqat), sallilikkat ungaluliat assigisaalluunniit aqqusernermi inissinneqaratilluunniit ivertinneqassanngillat angalaartunut isikkivik asserlugu allatulluunniit angalaarnermut ajoqutaallutik.

Imm. 5. Allagartat pilerisaarutit (reklamer), qullilersuutit allalluunniit aqqusernermit takuneqarsinnaasut peernissaat politiinit piumasarineqarsinnaavoq allattarfiusat napasut, nalunaaqutsiussat kalerrisaarutilluunniit assigippatigik, imaluunniit uukapaatitsisinaallutilluunniit allatut angallannermut ajoqutaasinnaappata.

Qamutitik ingerlasunut aalajangersakkat

Aqqusernup suatungaaniissusisaaq

§ 27. Qamutitik ingerlasut pissutsit naapertuutigalugit aqqusernermilu ingerlasut allat saniatigut eqqarsaatigalugit sapinngisamik talerpiup tungaatigut ingerlaniassappat.

Imm. 2. Qamummik ingerlasoq pisussaavoq ingerlaviup sinaaninngaanniit aallarnermi ingerlaviullu allanngortinnerani iliuuseqarnermi allanut navianaateqanngitsumik akornusersuutaasariaqanngitsumilluunniit pinissaa tamatigut sianigissallugu.

Imm. 3. Qamut allamik siuleqarluni ingerlasoq imatut ungasitsigaluni ingerlassaaq qamut siulini unikkaluarpat sukkaallisinneqaraluarpalluunniit apornissamut navianartuerullugu.

Sanguneq, kaajallanneq uteriartornerlu

§ 28. Ingerlatitsisup sangunialersinnani sangutinnanilu sianigissavaa iliuuseqarnermi tunuminit aggersunut navianaateqanngitsumik akornusersuutaasariaqanngitsumilluunnit pinissaa. Saamiup tungaanut sanguniarnermi illuatungaaniit aggersut qaangiunnissaat utaqqineqassaaq.

Imm. 2. Kaajallanneq uteriartornerlu aatsaat pisassapput angalluttunut allanut ulorianartorsiortitsinaniluunniit akornusersuutaanngitsumik.

Sukkassuseq

§ 29. Qamutininik ingerlanermi sukkassuseq tamatigut pissutsit naapertuutigalugit aaqqinneqarsimassaaq pingaartumik allanik navianartorsiortitsinninnissaaq sianigineqassalluni, ingerlatitsisullu qamummik nakkutiginnissinnaaneraniit sukkanerusumik ingerlasoqassanngilaq. Qamutininik ingerlasut pingaartumik pissutsit naapertuutigalugit sukkalisaarnaveersaassapput ingerlavimmi masattumi, quasartumi orsupalittumiluunniit, aqulliornartumilu naleqquttumik sukkassuseqassapput allat serpartarnaveersaarlugit.

Imm. 2. Politiit kommunalbestyrelsimik isumasioqatiginnereernikkut aalajangersaasinnaapput kommunimi ataasiakkaani tamakkualuunniit ilaanni sukkassusissap annerpaaffissaanik.

Imm. 3. Politiit aamma aqqusinerni aalajangersimasuni sukkassusissamut killissanik aalajangiisnaapput.

Naapinneq

§ 30. Qamutininik ingerlasut imminnut naapigiartortut tamarmik piffissaalluartillugu naammaatumik talerpiup tungaatigut ingerlaniassapput pisariaqarpallu kigaallassallutik. Aqqusernup ilaa assersimappat ingerlaviup asserneqarsimasup tungaatigut ingerlasoq pisariaqarpat tunuarsimagallassaaq.

Sanneqqutseriarneq

§ 31. Saneqqutseriarneq aatsaat pisassaaq angalusunut siunermit kingunermiillu aggersunut akornutaanngitsumik pisinnaagaangat aammalu aqqusineq ingerlavigisaq tamarmi takuneqarsinnaagaangat. Aqqusernit paarlannerisa siornisigut paarlannerisigulluunniit saneqquteriarneq aatsaat pissassaaq pissutsit ajornartitsinnippata aammalu mianersoqqissaarluni. Qamutininik ingerlasut pisinnaat ikaarfissaat qanilligunikke qamummik allamik saneqqutseriassanngillat qamutip saneqqunniakkamik pisinnaat ikaarfissaat assersimappagu tamakkerlugu takuneqarsinnaajunnaarlugu.

Imm. 2. Saamiup tungaatigut saneqqutseriartoqartassaaq. Taamaattorli cykelit knallertillu qamummik allatut ittumik saneqqutseriarsinnaapput talerpiup tungaatigut. Qamummik saamiup tungaanut sangunialersumik saneqqutseriarneq talerpiup tungaannaatigut pisassaaq.

Imm. 3. Qamummik ingerlasup salliup kinguliminiittup saamiup tungaatigut saneqquteriarniaraanni paasiguniuk sapinngisamik talerpiup tungaanut illuarsimassaaq ingerlaninilu sukkatsissanagu. Saneqqutsinnissaq saamiup tungaanut illuaqqissaq taamaasiornissaq navialisitsinaniluunniit akornusersuutaanngitsumik pisinnaalerniariarpat.

Tunuarsimasusaaq

§ 32. Qamutininik ingerlasut pingaartumik aqqusernit paarlaffiini mianersussapput.

Imm. 2. Aqqusinermut anillaanniartoq imaluunniit aqqusineq napillugu qamutininik ingerlaniartoq aqqusinikkut illugiimmik ingerlaartunut tunuarsimasusaaq (pinngitsoorani tunuarsimasusaaq) taamaasiornissaq § 23 naapertorlugu nalunaaqquatersuinikkut nalunaarneqarsimappat.

Imm. 3. Pinngitsoorani, tunuarsimasusaaq aamma atuutissaaq biilnut inissiisarfinniit, illuniit imaluunniit nunaminermiit, orsersortarfinniit assigisaannilluunniit aqqusernup avataanniittuniit anillaanniarnerni, kiisalu aqqusineeqqaniit, nunaannaap aqquserniniit assigisaannilluunniit anillaanniarnerni.

Imm. 4. Qamutininik ingerlasut allatigut imminnut sipisunik siunnerfeqarlutik ingerlaartillugit qamummik ingerlatitsisuuq ingerlaartumik allamik talerperlerinnittoq tunuarsimasusaaq (talerperlerisamat tunuarsimasusaaq), § 27, imm. 2 naapertorlugu allatut aalajangiisoqarsimangippat.

Imm. 5. Qamutininik ingerlasut tunuarsimasusaaq erseqqissumik piffissaalluartillugu sukkaallinermikkut imaluunniit uninnermikkut nalunaassavaat tunuarsimasusaaqertik eqquutinniaritsik. Aatsaat ingerlaqqittoqassaaq tamanna qamutit allat aqqusinermi sumiissusiat, ungasissusiat sukkassusiallu naapertorlugit aarlerinartoqanngitsumik akornusersuutaanngitsumillu pisinnaagaangat.

Imm. 6. Qamutininik ingerlasut saamimmut sangussanngillat sanguffigisassami ingerlasut allat ajoqutaanissat qaangiutsinnagu. Talerpimmut sangusoq sikkilertunut knallertitertunullu siumuinnaq ingerlasunut ajoqutaassanngilaq. Sikkilnut paarlattumik (naapittussanut) ingerlaarfissiat ingerlasinnaatitaatillugit sikkilertut knallertertullu siumuinnaq ingerlasut ajoqutaanissat qaangiuttsinnagu qamutininik ingerlasut saamimmut sangussanngillat. Sikkilertut knallertertullu aggertillugit taamatutaaq talerpimmut sangusoqanngilaq. Aqquserngit naapiffiisa avataanni aqqusinermut pingaarnermut isernermi aninermilu malittarisassat taakkorpiaat atuupput.

Imm. 7. Qamutininik ingerlasut aqquserngit naapiffiinut qanilliarortut isertulluunniit uneqqaartussat naapiffimmi ingerlaartunut pisariaqanngitsumik ajoqutaannatik ingerlaassapput. Aqquserngit naapiffianni aqutsiissutinik qullikillani qulleq qorsunngoraluarpalluunniit qamutininik ingerlasut napiiffimmut appakaatissanngillat, naapiffik allanit ingerlaarfigineqartillugu.

Pisuttunut pisussaaffiit

§ 32 a. Qamutunik ingerlasut pisuttunik naapitsisussat saneqqutitsisussalluunniit pisuttunik illuarseeqqaartassapput pisuttorluunniit aqqusinermit pisarialimmik inissaqartinniaqqaassallugu.

Imm. 2. Qamutunik ingerlasut pisuttut aqquataannut pisut imaluunniit illumiit aqqusinermut pisussat pisuttut qaangerseeqqaassavaat. Pisuttut aqquserngannut appakaattut napsillutilluunniit ingerlasussat aamma taamaaliussapput.

Imm. 3. Pisuttut aqqusermatigut qamutit ingerlaartut pisuttut immikkut sissuissavaat ataqquilluinnassallugillu.

Imm. 4. Sikkilertut ingerlaarfiisa sinaanni bussit unittarfiini ilaasut ikiffarinngisaanni niuffissarinngisaannilu qamutit ingerlaartut sikkilertut qaangerseeqqaassavaat pisariaqarpallu bussinut ilaasut niusut ikisulluunniit uniffigissallugit.

Imm. 5. Aqquserngit naapiffiini qamutunik ingerlaartut sangusussat ingerlaffissaminni pisuttunut navianartorsiortitsissanngillat. Aqquserngit naapiffiisa avataanni aqqusinermut pingaarnermut isermermi aninermilu malittarisassat taakkorpiat atuupput.

Imm. 6. Pisuttut ikaariartarfiini ingerlaarneq politiinit qullernilluunniit aqunneqartillugu qamutunik ingerlasut politiinit imaluunniit qullernit aqquatsissutinit ingerlaqquneqaralarunilluunniit pisuttut ikaarfissiamiittut qaangerseeqqaassavaat. Pisuttut ikaariartarfianni aqquserngit naapiffianni inissisimasumi qamutunik ingerlasut pisuffissiamut sangoreernerminni naleqquttumik sukkaassuseqassapput pisariaqarpallu ikaariartarfiimi pisuttut ikaarsinnaaqqullugit unissallutik.

Imm. 7. Qamutunik ingerlasut pisuttut ikaariartarfiannut qullernit aqutsiffiunngitsunut qanillisut pisuttunut navialisitsisussaannngitsumik ajoqutaasussaannngitsumillu sukkaassuseqartassapput. Qamutunik ingerlasut pisariaqarpat unissapput pisuttut qaangersiillugit.

Imm. 8. Qamutit ingerlasut pisuttut ikaariartarfiini sapinngisamik unittoornaveersaartassapput.

Uninneq qamummillu inissiineq il.il.

§ 33. Qamummik unittoqaraniluunniit inissiisoqassanngilaq angallannermut imaluunniit pisortat peqqusineratigut aputaajaasunut ulorianartorsiortitsisinnaallunilu pisariaqanngitsumik akornusersuutaasumik. Qamutit aqqusernup ingerlaarfiup sinerpiaanut imaluunniit ajornanngippat taassuma avataanut inissinneqartassapput. Qamutit aserortoorsimasut, magguttoorsimasut imaluunniit appussaasimasut qamutit ingerlaarfianniit sapinngisamik piaarnerpaamik peerneqartassapput, § 24, imm. 3-mi aalajangersakkanit allaasunik aalajangersagaqanngippat.

Imm. 2. Qamutit imm. 1-imi taaneqartunut akerliusumik inissitat politiinit peerneqarsinnaapput. Assartuinermit paaqqutarinninnermullu politiit aningaasaajaatigisimasaat ingerlatitsisup akiligassarai. Ingerlatitsisusooq ilisimaneqanngippat imaluunniit akileeqqusineqaraluaq taakkuninnga akiliiumanngippat aamma piginnittusooq (atusooq) akiliisussanngortinneqassaaq, ingerlatitsisusup piginnaatitaanani qamummik atuisimaneq uppersarnerqarsinnaanngippat. Aningaasat eqqartuussinerataqanngitsumik akilersinniarnaqarsinnaapput Kalaallit Nunaanni eqqartuussisarnermik inatsimmi kapitali 7-mi §§ 6-11-mi aamma §§ 19-23-mi maleruagassat malillugit.³⁾

§ 33 a. Sikkilit aqquataanni, pisuttut aqquataanni imaluunniit aqquserngit killingini pisuffissiani unittoqassanngilaq inissiisoqassananiluunniit. Aamma taama pineqassapput aqquserngit qeqqi,

aqquserngit avissarutaat assigisaallu. Taamaattorli qamutit 3,5 t sinnerlugit oqimaassusillit, § 23, imm. 2 naapertorlugu allanik allassimasoqartinnagu, aqquserngit killingini pisuffissiat ilaanni qamutit unitsinneqarsinnaapput imaluunniit inissinneqarsinnaapput tamanna aqquserngit killingini pisuffissiani angallattunut naviualisitsissanngippat imaluunniit ajoqutaassanngippat. Oqaaseqatigiit siulliit sikkilinet aamma knallertinet marlunnik assakaasullinnut atuutinngillat.

Imm. 2. Qamutinik unitsitsisoqassanngilaq imaluunniit iniissiisoqassanngilaq

- 1) pisuttut ikaariartarfiini imaluunniit sikkilerfissiat anillagiaanni imaluunniit pisuttut ikaariarfiisa imaluunniit qamutit ingerlaartut anillagiarfiisa sioraanni 5 m-nik ungasissusillit iluanni,
- 2) aqquserngit naapiffiini imaluunniit qamutit ingerlaarfiisa paarlangasut imaluunniit sikkilerfissiat killingisa qaninnernit 10 m-nik ungasissusillit iluanni,
- 3) angallattunut aqutsissutit kallerrisaarutilluunniit asserneqarfigisinnaasaanni,
- 4) viaduktini imaluunniit tunnel-ini,
- 5) qattorngit qaavini eqqaaniluunniit imaluunniit sangorissani sangorissaniluunniit angallattunik allanik isikkiveqanngitsuni,
- 6) aqquserngit naapiffii sioqqullugit ingerlaarfissat agguarneqarfiini tamakkuluunniit aallartiffii sioqqullugit 5 m-nik ungasissusilinni,
- 7) agguarneqarfiit titarneqarfiisa eqqaanni qamutit titarnerullu akornat 3 m-nik annikinnerusuni aamma qamatit titarnerillu akornanni kipifferartumik titarnilersukkami, imaluunniit
- 8) taxanut uninngaarfissatut nalunaaqutsersukkani.

Imm. 3. Bussit unittarfiattut skiltip nalaanni illugiinni nalunaaqutsersukkani uninneq imaluunniit inissiineq inerteqqaavaoq. Nalunaarsukkamik taama ittumik peqanngippat skiltip nalaanni illugiinni 12 m-nik ungasissusilinni tamannattaq inerteqqaavaoq.

Imm. 4. Inissiisoqassanngilaq

- 1) illunut aqquserngit sioraanni imaluunniit taakku anillagiaanni annertuumik ajornakusoortitsisumik,
- 2) aqqusernguo killingani qamutip uninngasup sinaani, eqqaassanngikkaanni sikkilit marlunnik assakaasullit, knallertit marlunnik assakaasullit imaluunniit motorcykelit marlunnik assakaasullit sinaatigut ilaasarfittaqaanngitsut, imaluunniit
- 3) qamutip allap asserneqarfissaani imaluunniit aallarnaveerfissaani.

§ 33 b. Aqquserngiortut qamutaannut §§ 33 aamma 33 a atuutinngillat, suliamut atatillugu uninnganissaq inissiinissarlunniit pisariaqartillugu pisarialimmillu sillimanissaq pillugu aalajangiisoqarsimatillugu. Aamma taama pineqarput politiit, annaasiniarnermi sillimassutit imaluunniit annaasiniartut qamutaasa uninngatinnissaat inissinnissaalluunniit eqqarsaatigalugu.

§ 33 c. Justitsministerip aalajangersinnaavaa qamutit motorillit piffissami killilikkami uninngasinnaatitaassasut uninngasinnaanermut allagartat taamaallaat atorneqartillugit. Uninngasinnaanermut allagartat taakkualu atornissaat pillugit justitsministeri aalajangersagaliussaaq.

Aqqusinerni suliaqarnermik nalunaaqutsersuutit

§ 33 d. Aqqusinermi suliaqartoqartillugu sulisoqarneranik tamatigut nalunaaqutsiisoqarsimanissaa suliamut isumaginnittup akisussaaffigaa.

§ 34. Qamutit matuiniq mappineq, qamutinuq ikineq qamutiniilluunniit niuneq aammalu usilersuineq usingiaanerlu pisassappat ulorianartorsiortitsinngitsumik imaluunniit pisariaqanngitsumik akornusersuutaanngitsumik.

Imm. 2. Qamummik ingerlatitsisup qamut qimaleruniuk isumaminik aallariataarsinnaannginnissaa qularnaassavaa. Ingerlatitsisusoq aammattaaq iliuuseqassaaq qamutit allanit piginnaatitaanngitsunit atorneqarsinnaannginnissaanut isumannaallisaatissanik.

Kalerrisaarinerit nalunaarinerillu

§ 35. Navianartoq pitsaaliorniartariaqartillugu qamutiniq ingerlaartup nipilimmik kallerisaarutitigut imaluunniit qaamaneq atorlugu kalerrisaarutitigut navianartoqarnera allanut paasitinniassavaa. Pisariaqanngitsumik imaluunniit soqutigittaatumik kalerrisaarinissaq inertequtaavoq.

Imm. 2. Qamutiniq ingerlaartut aqqusernit sinaanniit aallalersinnatik aammalu kaajallalersinnatik sangulersinnatilluunniit nalunaarissapput.

Imm. 3. Qamutiniq ingerlaartut uninnialersut imaluunniit tassanngaannaq kigaallanniartut imaluunniit ingerlavimminnik siunnerfigisaminnik allanngortitsiniartut tamanna nalunaassavaat allanut ilisimatitsissutiginnissa pisariaqarpat.

Qullit

§ 36. Qamutit qulliisa piffissami ikumaffigisassaanni, tassa seqernup tarrineranniit nuinissaata tungaanut, aammalu pujortumi allatulluunniit taamatulli isikkiviluttumi tarrajuttumiluunniit qullit qamutiniq ingerlaarnermi peqqussutigineqartutut ikumatinneqassapput.

Imm. 2. Qulliit ikumasussaataaffiisa nalaanni ingerlaarnermi qamutit motorillit qullii sakkukinnerit ikumatinneqartassapput. Taamaattorli atorlut motorillit atorlugit ingerlaarnermi tamaallaat tamanna atuutissaaq atortoq motorilik qullilerneqarsimappat. Qullernut sakkukinnernut taarsiullugu pujortumi qulliit imaluunniit ingerlaarnermi qulliit immikkut ittut ikumatinneqarsinnaapput.

Imm. 3. Aqqusinikkut naammattumik qaammarsarneqarsimasutigut ingerlaarnermi aammalu qamutip allap kinguatungaaniinnermi imaluunniit allamik naapitsiartornermi qulliit sakkortuut taartoortitsisinnaasut atorneqassanngillat.

Pisariaqanngitsumik nipiliortitsineq il.il

§ 37. Qamutiniq motorimik ingerlatilinnik ingerlatitsisusut pisariaqanngitsumik nipiliortitsinaveersaarlutillu putsumik gasimilluunniit aniatitsinaveersaassapput.

Imm. 2. Illut akornini eqqaaniluunniit pisariaqanngitsumik akornusersuutaasumillu qamutunik ingerlaartoqassanngilaq. Aammattaq sumiiffinni taamaattuni sukkassuseq qamummillu ingerlatsineq pisariaqanngitsumik allanut akornusersuutaatinnaveersaarneqassapput.

Qamutit qanoq ilaasoqartigalutillu useqartiginissaat

§ 38. Inunnik imaluunniit nassatanik inissiisoqartassanngilaq ingerlatitsusuusoq isikkiveerullugu aammalu qamummik aqutsiniarneranut naammattumik periarfissaarullugu. Nassatat inissinneqartassapput nalunaarinissaq § 35, imm. 2-mi 3- milu taaneqartoq imaluunniit qulliit peqqussutigisat normulerciilluunniit assernagit.

Imm. 2. Ilaasunik imminnut allanulluunniit ulorianartorsiortitsisinnaasutut amerlatigisunik ilaasoqartoqarnanilu inissiisoqartassanngilaq.

Imm. 3. Nassatat inissinneqartassapput inunnut ulorianartorsiortitsisinnaajunnaarlugit imaluunniit pigisanut aseruisinaajunnaarlugit. Inissinneqartassapput illikartoomaveerlugit nakkaasinaajunnaarlugit imaluunniit pisariaqanngitsumik nipiliorsinnaajunnaarlugit.

Imm. 4. Nassatanik qamutit avataasigut nuisasunik angallassinermi immikkut mianersortoqartassaaq. Nassatanik taamaattunik angallassinissaq taamatullu nalunaaqutsertarnissaat pillugit maleruagassat erseqqinnerusut transportministerip aalajangersarsinnaavai.

§ 39. Cykelini, motorcykelini snescooterinilu inuit taamaattuni amerlassusissarititaasunit amerlanerusut ilaasorineqartassanngillat. Meeqqat 6-it inorlugit ukiullit marluk cykelini ilaatinneqarsinnaapput immikkut issiavissaliorneqarsimagaangata cykelit assakaasuisa noqarutaanut assiaqutilinnik, aammalu cykelertoq 15-inik ukioqalereersimappat. Knallertini ingerlatitsisup saniatigut ilaasoqassanngilaq.

Ujatsiutaasat

§ 39 a. Biilimi, motorcykelimi knallertimiluunniit issiavik ujatsiutaasalerneqarsimappat ingerlaarnermi tassani issiasoq ujatsiutaasalertussaavoq, taamaattorli takuuk imm. 2 aamma 3.

Imm. 2. Meeqqat 3 inorlugit ukiullit ujatsiutaasamat taarsiullugu meeqqamat issiavissiaq imaluunniit isumannaallisaat alla meeqqap portussusianut oqimaassusianullu naleqqussagaq atussavaat. Meeqqat 3-nik ukioqaleersimasut sulili 7-nik ukioqalersimannngitsut ujatsiutaasamat taarsiullugu meeqqamat issiavissiaq imaluunniit isumannaallisaat alla meeqqap portussusianut oqimaassusianullu naleqqussagaq atussavaat. Ujatsiutaasamat ilaatillugu selepude atorneqarsinnaavoq.

Imm. 3. Kingumut ingerlanermi imaluunniit uniffissiakkut, orsersortarfimmi, iluarsaassisarfeqarfimmi assigisaanniluunniit ingerlaarnermi ujatsiutaasaqartussaataaneq atuutinngilaq.

Imm. 4. Ilaasut 15-inik ukioqalersimannngitsut imm. 5 malillugu imm. 1-3-mi aalajangersakkat naapertorlugit isumannaallisaatinik atuinissaat ingerlatitsisup nakkutigisassaraa.

Imm. 5. Justitsministeri makku pillugit aalajangersagaliorsinnaavoq,

- 1) meeqqanut 3 inorlugit ukiulinnut isumannaallisaatit qanoq atorneqassasut,
- 2) inuit ilaat isumannaallisaatinik atortoqartussaataaernermit ilaatinneqannginnissaannik,
- 3) immikkut pissusilinnik ingerlaarnerni isumannaallisaatinik atuisussaataaernermit ilaatinneqannginnissaq,
- 4) imm. 4-mi pisussaaffimmit bussinik ingerlatitsisut tamakkiisumik ilaannarmilluunniit ilaatinneqannginnissaannik aamma tamatumunnga taarsiullugu bussinik ingerlatsisup iliuisissanik aalajangiisussaananeramik.

Avaarnaveeqqutit

§ 40. Motorcykelimik, knallertimik snescooterimilluunniit ingerlatitsisut aammalu motorcykelini snescooteriniluunniit ilaasut 15-inik ukioqalereersimasut tamarmik ingerlaarnermi katattussaajunnaarlugit aalajangikkanik avaarnaveeqquteqassapput.

Imm. 2. Taamaattorli ujatsiutaasaqartussaqaartussaataaernermit avaarnaaveeqquteqartoqassanngilaq.

Imm. 3. Ingerlatitsisup isumagissavaa ilaasut 5-inik ukioqalereersimasut sulili 15-inik ukioqalersimannigitsut katattussaajunnaarlugit aalajangikkanik avaarnaveeqquteqarnissaat.

Imm. 4. Pinngitsoorani avaarnaveeqquteqartussaaneq atortuunngilaq qamutitut inissiisarfinni, qamutiteriffinni, sulliveqarfinni imaluunniit tamakkununnga assingusutigut ingerlaarnermi.

Imm. 5. Immikkut ittunik pisoqartillugu avaarnaveeqqummik pinngitsoorani atuisussaaneq politiit pinngitsoortissinnaavaat.

Mobiltelefoninik nalunaarasuartarnermilu atortunik allanik atuineq

§ 40 a. Qamutitik ingerlatitsisut ingerlaarnerminni mobiltelefoninik tigummiartakkanik atuissanngillat.

Imm. 2. Ingerlaarnermi nalunaarasuartarnermi atortut allat assigisaasalu atornissaat pillugit malittarisassanik transportministeri isumaqatiginninniarfigereerneratigut justitsministeri aalajangersaasinnaavoq.

Ikiuiartorluni qamutitik ingerlaarneq

§ 41. Qamutitik ikiuiartorlutik ingerlaartunik ingerlaartitsisusooq pisariaqarluinnartillugu mianersorluinnarlunilu kapitalimi matumani aalajangersakkanik malinninngitsoorsinnaavoq. Tamaattorli peqqussutigisat, nalunaarinninnikkut (usserarnikkut) politiitit peqqussutigineqartut tamatigut malinneqartassapput.

Pisuinnarnut aalajangersakkat

§ 42. Pisuinnaat aqqusinikkoortut sapinngisamik aqqusernup sinaatiguussapput annerusumillu aqqusernup saamiatungaartigut ingerlaniartassapput.

Imm. 2. Aqqusineq napillugu ingarlavissani pisuinnaat mianersorluartussaapput, pisuinnarnullu ikaarfissiat qanittumiippata taamaattut atorneqassapput.

Imm. 3. Pisuinnartut aamma isigineqassaaq sisoraatersortoq, sukuutersoq, assakaasulinnik kukuutersoq assigisaannilluunniit atuisoq.

Angallannermi maleruagassat allat

§ 43. Angallannermut maleruagassanik allanik ilanngullugit qamutit ilaasorisinnaasaasa amerlassusissaat, suulluunniit qamutininik assartugassat, inunnut immikkut navianaateqarsinnaasut, oqimaassusissaat angissusissaallu aammalu qanoq assartornissaat kiisalu sakkutuut qamutaannik, qamutininik ikiuiartortunik qamutinillu aqqusinniornermi atorneqartunik ingerlaarnermi maleruagassat immikkut ittut, justitsministeri⁴⁾ aalajangersaasinnaavoq.

Kapitali 5

Taarsiissutit akisussaassuseqarnermullu sillimmasiissutit Akisussaassuseqarnermut tunngavissat il.il

§ 44. Kinaluunniit qamummut motorimik ingerlatilimmut akisussaaffeqartoq ajoqusikkanut qamutip angallannermi ajutoorneratigut imaluunniit qamutip orserfianut attuumassutilimmik qaartoorneratigut imaluunniit ikuallanneratigut pisunut taarsiisussaavoq.

Imm. 2. Inummik ajoqusiinermut imaluunniit pilersuisuusumik annaasaqarnermut taarsiissutissat ikililernerqarsinnaapput imaluunniit atorunnaarsinneqarsinnaapput ajoquserneqartoq toqusoorluunniit ajoqusernermut piaaraluneernikkut pisooqataasimappat. Aammattaaq taarsiissutissat ikilineqarsinnaapput pisunilu immikkut ittuni atorunnaartussanngortinneqarsinnaallutik ajoqusertoq toqusoorluunniit mianersuaalliorujussuarnikkut ajoqusernermut pisooqataasimappat.

Imm. 3. Pinik ajoqusiinermut taarsiissutissat ikilineqarlutilluunniit atorunnaartussanngortinneqarsinnaapput piginnittuusooq piaaraluneernikkut mianersuaalliornikkulluunniit ajoqusiinermut pisooqataasimappat.

§ 45. Qamut motorimik ingerlatilik § 44, imm. 1-imi taaneqartuniit allaanerusumik ajoqusiippat, qamummut akisusaaffeqartoq taarsiissutitut akiliisussaavoq inatsisini maleruagassat nalinginnaasut malillugit.

§ 46. Inummik ajoqusiineq imaluunniit pilersuisuusumik annaasaqarneq, qamutit motorimik ingerlatillit apornerisigut pisoq, taarsiissuteqarfiusaaq § 44. imm. 1-imi 2-milu maleruagassat malillugit.

Imm. 2. Qamutit motorimik ingerlatillit imminnut apornerisigut pigisanik ajoqusiisoqartillugu pisoqarnerani pissusiviusut tunngavigalugit taarsiissuteqarnissaq aammalu aningaasat taarsiissutissat qanoq annertutiginnissaat aalajangiiffiginarneqartassapput.

§ 47. (Atorunnaarsinneqarpoq)

§ 48. §§ 44-47 malillugit taarsiissuteqarnissamut akisussaaneq piginnittuusumut atuisumulluunniit, qamummik atuisuusumut imaluunniit taassuminnga atuisitsisuusumut tutsinneqassaaq.

Imm. 2. Ingerlatitsisusooq inatsisini maleruagassat nalinginnaasut malillugit taarsiissuteqarnissamut akisussaassuseqarpoq.

Sillimmasiisussaaneq

§ 49. Ajoqusiinernut qamutinit motorimik ingerlatilinnit piliaasunut tunngatillugu taarsiiffigineqarnissamik piumasaqaatit selskabimi akisussaassuseqarnermut sillimmasiisarfiimmit, inatsisit malillugit Kalaallit Nunaanni sillimmasiisarnernik ingerlatsisumit matussuserneqassapput. Sillimmasiisarfiit Kalaallit Nunaanni qamutinit motorilinnut akisussaaneqarnik sillimmasiiffusartut Dansk Forening for International Motorkøretøjsforsikringimut (DFIM) ilaasortaassapput. DFIM-imut akiliutit ingerlaavartut akilernissaannut piumasaqaatit justitsministerimit aalajangersarneqassapput. Kalaallit Nunaanni qamutit motorinik ingerlatillit nalunaarsorneqartussaaneqarnut sillimmasiisarfiit akisussaaneqarnik sillimmaseerusuttut tamanna Kalaallit Nunaanni Politimesterimut nalunaarutigissavaat.

Imm. 2. Sillimmasiissutit inummik ajoqusiineq imaluunniit pilersuisuusumik annaasaqarneq matusivigisassaraat 50 mio. kr.-it tikillugit pigisanillu ajoqusiineq 10 mio. kr.-it tikillugit pisuni ataasiakkaani ajoqusiineqartillugu.

Imm. 3. Justitsministeri aningaasat annertussusissaattut imm. 2-mi taaneqartunik allannguuteqartitsisinnaavoq akiusut akissarsiallu allanngorarneri naapertuutigalugit. Iluarsiissutissat suut iluarsiissutigineqarnissaat ukiut tamaasa tamanut nalunaarutigineqartassaaq.

Imm. 4. Justitsministeri aalajangersagaliorsinnaavoq ajoqusiinerit nunani allani pisut sillimmasiissutiniit qanoq annertutigisumik matusivigineqarnissaat pillugu.

§ 50. Qamutinit motorimik ingerlatilinnut nalunaarsorneqartussaasunut tunngatillugu sillimmasiissamut pisussaavoq piginnittuusooq imaluunniit (atuisooq) qamummik sivisuusumik atuisussaataasooq.

Imm. 2. Qamutinit motorimik ingerlatilinnut allanut tunngatillugu sillimmasiissamut pisussaavoq qamummik atuisooq imaluunniit taassuminnga aqqusinermi atuisitsisooq.

§ 51. Justitsministeri aalajangersagaliussaaq sillimmasiisussaaneq naammssineqarnissaa pillugu, matumani akisussaaneqarnut inatsisitigut sillimmasiisussaataaneq naapertorlugu akisussaaneqarnik sillimmasiisarfik taarsiisussaataaneqarnik naammassinnissimangippat illugiilluni akiussaaqatigiinnermik aqissuussinermut sillimmasiisarfiit peqataasussaataaneqat ilanngullugu.

Imm. 2. Sillimmasiissutinit akiliutissat eqqartuussinertaqanngitsumik akilersinniarneqarsinnaapput kapitali 7-mi, §§ 6-11-mi aamma §§ 19-23-mi allassimasut malillugit.

⁵⁾ Aningaasat § 49, imm. 2-mi taaneqartunit amerlanerusut sillimmasiissutaasimappata maleruagassaq taanna akiliutissanut tamanut atortuutinneqassaaq.

Selskabip sillimmasiisarfiup akiliisussaanera utertitsiniarsinnaaneralu

§ 52. Selskabi sillimmasiisarfik ajoqusikkanut § 49, imm. 1, malillugu ajornaquteqanngitsumik taarsiiviginnittussaavoq.

Imm. 2. Selskabi sillimmasiisarfiup sillimmasiisullu akornanni selskabip ajoqusernermut akisussaassusilimmut § 48 malillugu akisussaassusillip mianersuaalliorneratigut pisoqarnerani akiliutissatigut piunasaqartussaaneranik isumaqatigiissuteqarsimaneq aatsaat inatsisit naapertorlugit kinguneqartussaavoq ajoquserneq mianersuaalliornikkut, soqutigittaatsuliorujussuarnermik taaneqarsinnaasukkut, sillimmasiisarfik akuliuttussanngortinneqarsimappat.

Qamutit sillimmasigaareersut

§ 53. Qamutit motorimik ingerlatillit naalagaaffimmit, Kalaallit Nunaanni Namminersorerullutik Oqartussanit imaluunnit kommunenit pigineqartut, § 49 malillugu sillimmasiisussaanermi pineqanngillat.

Imm. 2. Qamutit motorimik ingerlatillit naalagaaffinniit imaluunniit suliffeqarfinniit takornartanit pigineqartut pillugit justitsministeri aalajangersakkanik aamma taamaattunik aalajangersaasinnaavoq.

Imm. 3. Qamut imm. 1-imi 2-milu pineqartut ittoq sillimmasigaanngippat, Danmarkip naalagaaffia, Namminersorerullutik Oqartussat kommuneluunniit qamummik piginnittuusoq pisussaapput selskabip sillimmasiiffiup § 49 malillugu akisussaassuseqarnermut sillimmasiiffiusup taarsiissuteqartussaaneratulli taarsiissuteqarnissamut. Naalagaaffik, Namminersorerullutik Oqartussat kommunelu kimulluunniit ajoqusiinernut mianersuaalliornikkut soqutigittaatsuliornerujussuartut taaneqarsinnaasutigut pisunut § 48 malillugu akisussaassusilinnut aningaasatigut piunasaqarsinnaapput.

Suliassanngortut suliarineqarnissaat

§ 54. Ajoquser tup selskabi sillimmasiisarfik eqqartuussisunut suliassanngortippagu taava selskabip taassuma kikkulluunniit § 48 malillugu akisussaassuseqartut eqqartuussinissanut tamanut aggeqqussavai. Aggeqqusissut imm. 2-mi maleruagassat pillugit paasissutissanik imaqassaaq.

Imm. 2. Kinaluunniit imm. 1 malillugu eqqartuussivimmut aggeqquneqartoq eqqartuussinissami peqataasussanngortinneqarsinnaavoq tamanna pillugu qinnuteqaammi eqqartuussiviup aallattaaviinut allatsinneratigut. Peqataalinngikkuni taarsiissutissanut tunngasut eqqartuussutikkut isumaqatigiissutikkulluunniit aalajangiiffiginerat pinngitsoorani naammassiniagassarilissavaa.

§ 55. Ajoqusiinertalimmik inatsisinik unioqqutitsisumik unnerluutiginnittoqarpat §§ 44-46 naapertorlugit taarsiissuteqarnissamut akisussaaffiligaanermik nassataqarsinnaasumik, taava taarsiiffigineqarnissamik piunasaqaat pinerluttulerinertulli suliarineqarsinnaavoq Kalaallit Nunaanni eqqartuussisarnermik inatsimmi maleruagassat kapitali 5-imi § 44, allassimasut naapertorlugit ⁶⁾.

Imm. 2. Selskabi sillimmasiisarfik, qamummut unnerlutigineqartup atorsimasaanut akisussaasutut sillimmasiiffiusoq imaluunniit inuk § 53, imm. 3, malillugu ajoqusernermut pisumut akisussaassuseqartoq, taarsissuteqarnissamik apeqqutit suliarineqarneranni peqataasussatut isigineqassaaq eqqartuussinissanullu tamanut aggeqquneqassalluni.

Imm. 3. Unnerluutigisap saniatigut allanik § 48 malillugu taarsiissuteqarnissamut akisussaasoqarpat, aamma taakku eqqartuussinissanut tamanut aggeqquneqassapput. § 54-imi, imm. 1, oqaaseqatigiit aappaanni aamma imm. 2-mi alajangersakkat taamatulli atuutinneqassapput.

Kapitali 5 a

Uninnermut uninngaartarfimmiinnermullu akiliutit

§ 55 a. Makku unioqqutinneranni akiliummik kommunalbestyrelsit akiliissanngortitsissanersut justitsministeri aalajangiisinnaavoq

- 1) § 33 a, imm. 1, sikkilerfissiami, pisuffissiami, aqquuserngit qeqqini aamma aqquuserngit akunnerini kiisalu pisuttut aqquutaanni qamut tamakkerlugu unitsinneqarpat,
- 2) § 33 a, imm. 2, nr. 1, 2, 4, 6, 7 aamma 8, aamma imm. 3.
- 3) § 33, imm. 4, nr. 1, illumut tassanngalu anillattarfiup sioraani qamutunik inissiinnermut, aamma nr. 2.
- 4) nalunaaqutsikkani uneqqusaaffiunngitsuni imaluunniit inisseeqqusaaffiunngitsuni,
- 5) nalunaaqutsiinikkut inerteqqutaanngikkaluami § 23 malillugu uniffigeqqusaanngitsuni inissiffigeqqusaanngitsunilu, aamma
- 6) § 23 imaluunniit § 33 c naapertorlugit uneqqusinnginneq inisseeqqusinnginnerluunniit pillugit aalajangersakkat allat.

Imm. 2. Akiliummik akilisussanngortitaaneq pillugu aalajangerneq allaffissornikkut oqartussaaffeqarfirmut qaffasinnerusumut suliasanngortinneqarsinnaanngilaq tamannalu pisortat ingerlatsineranni sulianik suliarinnittarneq pillugu Inatsisartut inatsisaanni § 19-imi ilanngunneqarsimangippat. Akiliut kommunimut nakkutilliiffiusumut akiliutigineqassaaq.

Imm. 3. Akiliummik akileeqqusineq qamummut ikkullugu allagarsiinikkut imaluunniit ingerlatsisumut tunniussinikkut nalunaarutigineqassaaq.

Imm. 4. Eqqunngitsumik unittoq inissiisorluunniit akiliummik akiliisussaavoq. Piffissaq killiliusaaq tikitsinnagu akiliut akilerneqanngippat, piginnittoq (atuisoq) aamma akisussaatinneqassaaq, ingerlatsisoq qamummik piginnittutut uppersarsarneqanngippat. Akiliummik akileeqqusineq pillugu aalajangiinerit naammassineqarsinnaapput kalaallit oqartussaasuisa aalajangigaannik pinngitsaaliinikkut naammassinninnissaq pillugu Kalaallit Nunaanni eqqartuussisarnermik inatsimmi maleruaqqusat malillugit.

Imm. 5. Akiliut 510 kr-inik annertussuseqarpoq.

Imm. 6. Kommunip biilnik inissiisarfinnik nakkutilliinera pillugu justitsministeri malittarisassiorsinnaavoq.

Kapitali 6

Unnioqutitsinerit

§ 56. § 3-imik, § 5-imik, imm. 1, §§ 9-11-imik, §13-imik, imm. 1 aamma imm. 2, § 16-imik, imm. 5, §§ 17-imik, § 18, imm. 1, §§ 19 aamma 20-mi oqaaseqatigiinnik siullernik, § 22-mik, § 22-mik, § 23-mik, imm. 1, § 24-mik, imm. 1, imm. 2 aamma imm. 4, § 25-mik, § 26-mik, imm. 1-4, §§ 27-32 a-mik, §33-mik, imm.1, § 33 a-mik, § 33 d-mik, § 34-39-mik, § 39 a-mik, imm. 1, imm. 2-mik, oqaaseqatigiinnik siullernik, aamma § 40-mik, imm.1 aamma 3-imik, § 40 a, imm. 1-imik, § 41-mik, § 42-mik aamma § 49, imm. 1-imi oqaaseqatigiit siulliannik aappaannillu aamma oqaaseqatigiit sisamaannik aamma imm. 2-mik unioqutitsineq imaluunniit inatsit naapertorlugu inerteqqutassumik peqqussutigineqartumilluunniit malinninnginneq Kalallit Nunaanni pinerluttulerinermik inatsit malillugu pineqaatissiinermik nassataqarsinnaavoq. Tamanna aamma atuutissaaq qamutunik motorimik ingerlatilinnik, allagartaqarnissamik piumasaqarfiusunik, qamutini taamaattuni ingerlatitsisuusinnaatitaaneq imaluunniit ingerlatitsisunngornissaq, pineqartumiit arsaarinnissutaasimatillugu ingerlassinermi.

Imm. 2. Maleruagassani inatsit naapertorlugu suliaasussani aalajangerneqarsinnaavoq maleruagassani aalajangersakkanik unioqutitsineq pinerluttulerinermik inatsit malillugu pineqaatissiinermik kinguneqarsinnaavoq.

Imm. 3. Aktiaatileqatigiiffik, anpartsselskabi, andelsselskabi assigisaaluunniit unioqutitsippat ingerlatseqatigiiffik akiliisussanngortinneqarsinnaavoq.

§ 56 a. Inatsimmik taassuminnga unioqutitsineq aamma inatsit tunngavigalugu peqqussutunik unioqutitsineq pillugu akiliisitaanissat annertussusilerneqassaput kisitsinik 500-mik agguarneqarsinnaasunik, taamaattorli takuuk imm. 2.

Imm. 2. Isertitakilluinnartut akiliisitaanissaat annertussusilerneqarsinnaapput kisitsinik 500-mik agguarneqarsinnaanngitsunik. Taamatulli akiliisitsinerit 300 kr. ataallugit annertussusilerneqarsinnaanngillat.

Imm. 3. Inatsimmik taassuminnga imaluunniit inatsit naapertorlugu peqqussusianik ataasiarlutik arlaleriarlutilluunniit unioqutitsisut unioqutitsinerit tamaasa immikkut katiterlugit akiliisussanngortinneqassapput. Inatsimmik taassuminnga imaluunniit inatsit naapertorlugu peqqussusianik aamma inatsimmik ataatsimik arlalinnilluunniit inatsinillu allanik ataasiarlutik arlaleriarlutilluunniit unioqutitsisut unioqutitsinerit tamaasa immikkut katiterlugit akiliisussanngortinneqassapput.

Imm. 4. Inatsimmik taassuminnga imaluunniit inatsit naapertorlugu peqqussusianik ataasiarlutik arlaleriarlutilluunniit unioqutitsisut unioqutitsinerit ilaat ataaseq akiliisitaanerinnngitsumik pineqaatissinneqarpat allalu akiliisussanngortitaappat allamik pineqaatissinneqarnerup saniatigut eqqartuussivik akiliisussanngortitsisinnaavoq. Aamma tamanna atuutissaaq inatsimmik taassuminnga imaluunniit inatsit naapertorlugu peqqussusianik aamma inatsimmik ataatsimik arlalinnilluunniit inatsinillu allanik ataasiarlutik arlaleriarlutilluunniit unioqutitsisut unioqutitsinerit tamaasa immikkut katiterlugit akiliisussanngortitsinermi.

§ 57. Politiit isumaqarpata imigassartorsimalluni qamutinin ingerlaarsimaneq imaluunniit promillep annertussusissaanut killissarititaasoq sinnerlugu imersimalluni qamutinin ingerlaarsimaneq pillugit suliassaq § 59, imm. 2, nr. 2 malillugu akiliisitsinermik nassataqartariaqartoq, taava unnerluussutitut allakkiaq pasisamut nalunaarutigineqarsinnaavoq suliassap eqqatuussivikkoortitsinertaqanngitsumik aalajangiiffiginarneqarsinnaaneranik oqaaseqaatitalerlugu, pasineqartoq misiannigipaat aammalu taamatut aalajangiisoqarnissaanik kissaateqaruni nalunaassaaq piffissaliussap naleqquttup qaangiutinnginerani politiit akiliisitsissutissatut angissusiligaannik akiliinissamut piareersimalluni, aammalu ingerlatitsisuusinnaatitaanerup piffissami erseqqinnerusumik taasami patsisissaatitalimmik imaluunniit ingerlaannartumik arsaarinnissutaanissaa akuersaarini.

Imm. 2 Kalaallit Nunaanni ⁷⁾ eqqartuussisarnermik inatsimmi kapitali 5-imi, § 21, imm. 2-mi aalajangersaaq taamatulli atuutinneqassaaq.

Imm. 3. Imigassartorsimalluni qamutinin ingerlaarsimaneq imaluunniit promillep annertussusissatut killisaritaq sinnerlugu imersimalluni qamutinin ingerlaarsimaneq pillugu suliassani § 59, imm. 1, nr. 2 malillugu akiliisitsinissamik eqqartuussuteqarfiusussatut isumaqarfisani, unnerluutigineqartup pisuunera qularutissaasorineqartinnagu, eqqartuusiviup erseqqinnerusumik angissusilikkanik akiliisitaanissaminut akuersisinneqarneratigut aammalu piffissami erseqqinnerusumik taasami ingerlatitsisuusinnaatitaanermik arsaarallarneqarnissaminut akuersisinneqarneratigut pisussatut.

Imm. 4. Imm. 1 aamma imm. 3 malillugit akuersinerit pineqaatissiisutinin naammassinninniarnissaaq pisimasullu assinginik pisoqaqqinnerata kingunerisassai eqqarsaatigalugit eqqartuussutitullu kinguneqartinneqassapput.

§ 58. Oqaaseqaasiussatut allagarsiussaq § 57, imm. 1-imi taaneqartoq imaqaassaaq pasineqartup akuersiniarnissamut aalajangiinialersinnani illersuisussarsisinnaanissaanik. ⁸⁾

Imm. 2. Pasineqartup qinnuteqarneratigut inummik, Kalaallit Nunaanni eqqartuussisarnermik inatsimmi kapitali 5-imi § 23, patsisissaatitanik naammassinnissimasumik, toqqaasoqassaaq. ⁹⁾

Imm. 3. Kalaallit Nunaanni eqqartuussisarnermik inatsimmi kapitali 5-imi, § 27, oqaaseqatigiinni siullerni aalajangersagaq taamatulli atuutinneqassaaq. Suliassani pineqartuni illersuisuusup akissarsiassaanut najoqqutassat justitsministerip aalajangissavai.

Kapitali 7

Qamummik ingerlatitsisinnaatitaanermik arsaarinninneq

Misiligutaasumik arsaarinnikkallarneq

§ 59. Qamummik motorimik ingerlatilimmik ingerlatitsisinnaatitaaneq ingerlatitsisuusinissamut allagartaqarnissamik piunasaqarfiusoq ingerlatitsisuusumiit arsaarinnissutigineqassaaq

1) ingerlatsisoq angallannerup pingaarutilimmik isumannaatsuutinissaanik saneqqutinermigut inummik imaluunniit pigisamik ajoqusiipaat imaluunniit tamatumunnga navianartorsiortitsipaat,

- 2) ingerlatsisoq sukkassuserisassamik § 29, imm. 2 aamma 3 naapertorlugit aalajangersakkamik 60 pct. Sinnerlugu qaangiisimappat,
- 3) ingerlatsisoq § 60, imm. 1, oqaaseqatigiinnik siullerni pineqanngitsumik imersimalluni ingerlaarsimanermut pisuussuteqarpat, imaluunniit
- 4) unioqqutitsinerup suussusianik tunngaveqartumik ingerlatsitsisinnaanermut allagartaajagaasimappat aamma qamutip motorimik ingerlatillimmik ingerlatsitsinermigut unnerluutigineqartup pissusilersuutai paasissutissanik pigineqartunik tunngaveqarpata.

Imm. 2. Misiligutaasumik arsaarinninngikkallarnek atortinneqassaaq patsisissaatitalerlugu pineqartup inissutaasumik eqqartuussaannermiit ukiuni 3-ni misiligaaffimmini qamutunik motorimik ingerlatilinnik ingerlatitsisinnaajunnaarlugu arsaarneqartussanngorneranik. Misiligutaasumik arsaarinninngikkallarnermi piffissap arsaarinninnissap sivisussusissaata aalajangerneqarnissaa kinguartikkallarnekassaaq.

Imm. 3. Eqqartuunneqartoq piffissami miligaaffigisamini iliuuseqaqqippat ingerlatitsisusinnaatitaaneranik arsaarinnissutaasussamik taava eqqartuussisut aalajangissapput iliuuserisaa tamanna siusinnerusukkullu inatsisinik unioqqutitsisimasutut eqqartuunneqarnera ataatsimoortillugit ingerlatitsisinnaatitaaneranik arsaarinnissutigineqassasut.

Misiligutaanngitsumik arsaarinnikkallarnek

§ 60. Qamummik motorimik ingerlatilimmik ingerlatitsisinnaatitaaneq ingerlatitsisuunissamut allagartaqarnissamik piunasaqarfusoq ingerlatitsisuusumiit arsaarinnissutigineqassaaq

- 1) ingerlaarnermi ingerlaareernermiluunniit aak 1,20 promille sinnerlugu akoqartillugu ingerkatsisoq aalakoornu ingerlatsisimanermut imminut pisuutippat,
- 2) inummik allaluunniit pigisaanik piaaraluni ajoqusiisimappat, piaaraluni ulorianartorsiortitsisimappat imaluunniit qamut motorimik ingerlatilik immikkut peqqarniissusilimmik ingerlassimappagu,
- 3) pissutsini arlariinni § 59, imm. 1, nr. 1-3-mik pineqartunut tamanut immikkut pisuutippat,
- 4) siusinnerusukkut misiliutaasumik arsaarinniffigineqarsimappat misilitsinnerullu nalaani nutaamik unioqqutitsisimappat, imaluunniit
- 5) siusinnerusukkut misiliutaanngitsumik arsaarinniffigineqarsimappat arsaarinninnerullu qaangiunnerani ukiut 5 ingerlaneranni allamik unioqqutitsisimappat.

Imm. 2. Immikkut sakkukillisaasoqartillugu misiligutaasumik arsaarinnittoqarsinnaavoq arsaarinninneq imm. 1 malillugu misiligutaasussaannngortinneqarsimannngikkaluarpat.

Imm. 3. Qaamatit 6 aamma ukiut 10 akornanni misiliutaanngitsumik arsaarinnittoqassaaq imaluunniit qaqugumuulluunniit atuuttussamik.

§§ 61-63 (Atorunnaarsinneqarput).

*Eqqartuussineq ingerlanneqartillugu ingerlatitsisinnaatitaanerup
arsaarinnissutaagallarnera*

§ 64. Politiit isumaqarunik pineqartoq ingerlatitsisinnaatitaaneramik pinngitsoorani arsaassallugu pissutissaqartoq ingerlatitsisinnaatitaaneramik arsaarallarsinnavaat. Taama pisoqartillugu politiit pineqartoq ilitersussavaat arsaagaanini kredsdommerimut misilitsissallugu periarfissaqartoq, tak. imm. 2.

Imm. 2. Ingerlatitsisinnaatitaanerminik arsaagaagallartup piumasarisinnaavaa arsaagaanermi kredsdommerimut misilitsinnissaa. Aalajangiineq pasineqartup imaluunniit unnerluutiginnittussaaitat tamarmik immikkut landsdommerimut suliassanngorteqqissinnaavaat.

Imm. 3. Piffissaq ingerlatitsisinnatitaanermik arsaarinnikkallarfiusoq piffissap eqqartuussutikkut arsaarinniffiusup sivissusianut ilanngaataassaaq.

*Eqqartuusummik suliassanngortitseqqinnerup
kinguneri*

§ 65. Eqqartuusummik ingerlatitsisinnatitaanerup pinngitsoorani arsaarinnissutaaffigisaanik suliassanngortitseqqinneq arsaarinninneq eqqarsaatigalugu kinguartitsigallarsinnaanermik kinguneqartussaannqilaq, landsdommeri taamatut aalajangissanngippat. Eqqartuusseqqaarfusumi pinngitsuutitsineqarpat eqqartuussullu unnerluutiginnittussaaitat tungaanniit suliassanngortitaaqqissappat suliassanngortitseqqinnerup nalaani – ingerlatitsisinnaatitaanerup arsaarinnissutaanerata atuutiinnarnissaa immikkut pissutissaqartillugu – taava unnerluutiginnittussaaitat taakkua tamanna pillugu apeqqummik landsdommerimut saqqummiussisinnaapput.

*Piffissap arsaarinniffiusup naannginnerani ingerlatitsisinnaatitaaneerup
pigisarileqqinnissaa*

§ 66. Qamummik motorimik ingerlatilimmik ingerlatitsisinnaatitaaneq ukiunit 3-nit sivissunerusumik arsaarinnissutaasimappat pisinnaatitaaffiup pigisarileqqinnissaanik apeqqutip piffissap arsaarinniffiusup naannginnerani eqqartuussisunut suliassanngortinneqarnissaa piumasarineqarsinnaavoq. Aalajangiineq inerneqassappat ingerlatitsisinnaatitaaneq pigisarileqqinneqassanngitsoq taava tamatuminnga apeqqut siusinnerpaamik ukiut marluk qaangiuppata eqqartuussisunut suliassanngorteqqinneqarsinnaavoq.

*Ingerlatitsisinnaatitaanermik arsaagaagallarnermi imaluunniit
arsaagaanermi taarsiivigineqarsinnaaneq*

§ 67. Kalaallit Nunaanni¹¹⁾ eqqartuussisarnermik inatsimmi kapitali 8-mi aamma §§ 2 aamma 3, maleruagassat atuutinneqassapput pinerluttuliortutut isigineqarluni eqqartuussaasimaneq

pissutigalugu ingerlatitsisinnaatitaanermik arsaagaagallarnermut tunngatillugu taarsiivigineqarnissamik piumasaqarnerni.

Kapitali 7 a

Arsaarinninneq

§ 67 a. Inatsimmik matuminnga annertuumik imaluunniit uteqattaartumik unioqqutitsinerni qamut motorimik ingerlatilik ingerlatsisinnaanermut allagartaqarfiususaaq atorneqartoq arsaarinnissutigineqarsinnaavoq inatsimmik unioqqutitseqqittarnissat pinaveersaartinneqartarialittut isigineqarpata. Assinganik tunngavissaqartillugu qamut unioqqutitsinermi atorneqarsimangikkaluarpalluunniit qamut motorimik ingerlatilik unioqqutitsinermi atorneqartoq piginnittuanit arsaarinnissutigineqarsinnaavoq.

Imm. 2. Qamummik piginnittoq aava aalakoornartumik 1,20 promille sinnerlugu akoqartillugu aalakoornartumik ingerlaarsimanermut pisuussuteqarpat ingerlatitsisinnaanermut misiligutaanngitsumik allagartaajagaassutaappat pineqartorlu ukiut kingulliit 3 ingerlaneranni unioqqutitseqqinnikkut aava 1,20 promille sinnerlugu akoqartillugu aalakoornartumik ingerlaarsimanermut misiligutaanngitsumik allagartaajagaappat, qamut arsaarinnissutigineqarsinnaavoq.

Imm. 3. Unioqqutitsinermi qamut atorneqangikkaluarpalluunniit imm. 2 malillugu arsaarinnittoqassaaq.

Imm. 4. Immikkut tunngavissat uani immikkut patsisaatillugit imm. 2-mi aalajangersagaq malinneqanngissinnaavoq.

Imm. 5. Kalaallit Nunaanni pinerluttulerinermik inatsimmi arsaarinnittarneq pillugu malittarisassat aammattaaq atuupput.

Kapitali 7 b

Iluarsiissutit allanngortinneranni iliuusissat il.il.

§ 67 b. Sukkassusissamik unioqqutitsinermi iliuusissat allagartaajagaanissamillu apeqqutit, tak. § 29, pinerlunnerup pinerani malittarisassat atuuttut malillugit aalajangiiffigineqassapput.

Kapitali 8

Aqqusinniorneq

§ 68. Aqqusinniassat, angallannerup isumannaatsuunissaanut aqqissuunnissaanullu pingaaruteqartut, suliarinissat kommunalbestyrelsimit aalajangiiffigineqalersinnagit tamakkununga tunngasumik suliassat politiinut oqaaseqaateqarfigisassanngorlugit saqqummiunneqareersimassapput.

Kapitali 9

Piginnaatitsissutitut aalajangersakkat allat

§ 69. Angallannermut ministeri, soorlu suliassat erseqqinnerusumik taasat taamaallaat tungaasigut, maleruagassaliorsinnaavoq qamutit motorimik ingerlatillit inuutissarsiutitut inunnik angallassissutaanissaat pillugu. Tamatumunnga ilanngullugu aalajangersarneqarsinnaapput taxani businilu ingerlatitsisuunissap akuersissutaaqqaartarnissaa, akuersissutit taamatut qanoq amerlassuseqartitaanissaat pillugit maleruagassat, kiisalu akit qamutillu aaqqissuuneri, atortui atornerarnerilu pillugit maleruagassat.

§ 70. Qamutiniq ingerlatisisoqanngitsunik attartortitsisarneq pillugu justitsministeri immikkut ittunik maleruagassaliorsinnaavoq.

§ 71. Justitsministeri taamaasiornissamut immikkut pissutissaqartillugu aalajangiisinnaavoq inatsit sumiiffit ilaannut erseqqinnerusumik taasanut atuutinneqassanngitsoq aammalu tamatumunnga atatillugu sumiiffinni pineqartuni taakkunani angallanneq pillugu maleruagassaliorsinnaassalluni.

§ 71 a. Innarluutillit immikkut pisariaqartitaat akuersaarsinnaajumallugit politiit inatsimmi uani kapitali 1-4-mi aalajangersakkanik atuutitsinnngissinnaapput angallannermi isumannaatsuunissaq illersorneqarsinnaasutut isumaqarfingeqarpat.

§ 72. Inatsimmi matumani transportministerip piginnaatitsissutissai Færdselsstyrelsimut, taassuma ataani styrelsimut allamut suliffeqarfimmulluunniit assigisaanut transportministerip isumagisassanngortissinnaavai.

Imm. 2. Imm. 1 malillugu piginnaatitsissutit tunngavigalugit aalajangiinerit naammagittaalliuutigineqarsinnaanerit pillugu transportministeri malittarisassiorsinnaavoq, matumani ilanngullugit aalajangiinerit ministerimut suliassanngortinneqarsinnaanngitsut.

§ 72 a. Inatsimmi matumani justitsministerip piginnaatitsissutissai politiinut justitsministerip isumagisussanngortissinnaavai, matumani ilanngullugit aalajangiinerit ministerimut suliassanngortinneqarsinnaanngitsut.

Imm. 2. Imm. 1 malillugu piginnaatitsissutit tunngavigalugit aalajangiinerit naammagittaalliuutigineqarsinnaanerit pillugu justitsministeri malittarisassiorsinnaavoq, matumani ilanngullugit aalajangiinerit ministerimut suliassanngortinneqarsinnaanngitsut.

§ 72 b. Inatsimmi matumani skatteministerip piginnaatitsissutissai politiinut skatteministerip isumagisussanngortissinnaavai, matumani ilanngullugit aalajangiinerit ministerimut suliassanngortinneqarsinnaanngitsut.

Imm. 2. Politiit piginnaatitsissutini imm. 1-imi taaneqartut ingerlatsinerannik naammagittaalliuuteqarsinnaaneq pillugu skatteministeri malittarisassiorsinnaavoq, matumani ilanngullugit aalajangiinerit Landskatteretimut naammagittaalliuuteqarsinnaaneq. Politiit ingerlatsinerat pillugu naammagittaalliuutit allaffissornikkut aalajangiiffigineqarsinnaannginnerannik skatteministeri malittarisassiorsinnaavoq.

Kapitali 10

Atuutilersitsinermik ikaarsaariarnissamullu aalajangersakkat

§ 73. Inatsit atuulissaaq 1. oktober 1992.

Imm. 2. Ullormit tassangaaniit atorunnassaaq Kalaallit Nunaanni aqqusinertigut angallannermut inatsit nr. 197, 8. juni 1966-imeersoq. Nalunaarutit inatsit atorunnaartoq naapertorlugu suliarineqartut atuutiinnassapput atorunnaarsitaanissartik tikillugu, aalajangersakkanillu taakkuninnga unioqqutitsinerit pinerluttulerinermik inatsit malillugu pineqaatissiissutaasinnaapput. Taamaattorli Kalaallit Nunaanni Snescooterinik ingerlatitsisut qassinik ukioqalersimasussaanerat pillugu nalunaarut nr. 387, 31. august 1979-imeersoq 1. oktober 1992-imiit atorunnaassaaq.

§ 74. Pissutsit piliaasimasut pissutigalugit ingerlatitsisinnatitaanermik arsaarinninnerit sulili 1. oktober 1992-imi inissutaasumik eqqartuussissutigineqarsimannigitsut pillugit apeqqutit taamaallaat aalajangiiffigineqartassapput inatsimmi matumani maleruagassat malillugit.

Imm. 2. Alajangersakkat § 57, imm. 3-4-mi taaneqartut atortuutinneqassapput suliaassani tamani 1. oktober 1992-imi siullermeersumik eqqartuussinermi aalajangiiffigineqarsimannigitsuni.

§ 75. Ingerlatitsisinnaatitaanermik pinngitsoorani arsaarinninnerit maleruagassat maannamut atuuttut malillugit pisimasut atuussinnaasuseqarnerat allanngussanngilaq inatsillu manna malillugu inatsisitigut kingunissaqartitaassallutik.

§ 76. § 49, imm. 2. ajoqusiinermut inatsisip atuutilersinneqareerneratigut ajoqusiinerusunut atuutiinnarpoq. Akisussaassuseqarnermut sillimmasiinerit atuutilersitsineq sioqqullugu sillimmasiinerusut aalajangersagaq aammalu § 49, imm. 2-mi piunasaqaatinik naammassinninngitsut aalajangersagaq taanna naapertorlugu allanngortinneqassapput. Sillimmasiinermut uppersaatiit (policer) pisoqaanerisut tamatuminnga allagarserneqartariaqanngillat. Sillimmasiisut oqaaseqatigiit aappaasa nassatarisaanik sillimmasiissutiniq allannguuteqartitsineq pissutigiinnarlugu akiliutissat qaffanneqarnerat tunngavigalugu sillimmasiinermut isumaqatigiisummik atorunnaarsitsisinnaanngillat.

Kalaallit Nunaanni aqqusinertigut angallanneq pillugu inatsisip allannguutaa pillugu inatsit nr. 497, 17. juni 2008-meersup (Aalakoornartutorsimatilluni ingerlatsineq, snescooterinik

ingerlatitsisuusinnaasunut ukiussarititaasoq il.il.) ¹²⁾ atuutilersinnerannut aalajangersakkat makku imarai:

§ 2

Imm. 1. Inatsit manna atuutilerpoq 1. oktober 2008, taamaattorli takuuk imm. 2.

Imm. 2. Inatsimmi § 1, nr. 9-p ulloq atuutilerfissaa justitsministerip aalajangissavaa.

Justitsministereqarfik, ulloq 26. Oktober 2009

BRIAN MIKKELSEN

/ Anette Arnsted